

Dangosyddion llesiant cenedlaethol 2021-22

Mae'r ddogfen hon yn darparu dolenni lle mae rhagor o wybodaeth ar gael mewn perthynas ag ansawdd y data a ddefnyddir yn y Dangosyddion Cenedlaethol a gyhoeddir yn adroddiad Llesiant Cymru. Mae'r dolenni'n rhoi manylion fel cwrpas, cryfder a chyfyngiadau'r data, a hefyd y prosesau a ddefnyddir i gynhyrchu a chyhoeddi'r setiau data y tu ôl i'r dangosyddion.

Gan fod y data ar gyfer y dangosyddion wedi dod o amrywiaeth o setiau data, bydd lefel yr wybodaeth o ansawdd sydd ar gael yn amrywio ym mhob achos. Ar gyfer y dangosyddion a gymerir o ddata a ddynodir gan y Swyddfa Rheoleiddio Ystadegau fel Ystadegau Gwladol, bydd adroddiadau ansawdd ar gael mewn manau eraill sy'n rhoi manylion y fethodoleg a ddefnyddiwyd a hefyd yn ymdrin â materion sy'n ymwneud ag ansawdd data. Felly, lle bo hynny'n wir, rydym wedi darparu dolenni i'r adroddiadau ansawdd hynny isod. Ar gyfer y dangosyddion lle mae'r data yn Ystadegau Swyddogol, yn hytrach na rhai sydd wedi eu dynodi'n Ystadegau Gwladol, efallai na fydd adroddiad ansawdd ar gael. Fodd bynnag, bydd gwybodaeth o ansawdd ar gael yn y Datganiad Ystadegol, os cyhoeddir un. Felly, yn yr achosion hyn, rydym wedi rhoi dolenni i'r Datganiad Ystadegol perthnasol.

Ar gyfer rhai dangosyddion lle nad yw'r data'n cael ei gyhoeddi fel Ystadegau Swyddogol, mae'n debygol y bydd llai o wybodaeth am ansawdd wedi ei chyhoeddi yn barod, ac felly rydym wedi cynnwys mwy o fanylion am ansawdd yn y ddogfen hon.

Dangosydd 1: Canran genedigaethau sengl byw gyda phwysau geni o lai na 2,500g

Mae gwybodaeth am ansawdd data ar gael yn yr Adroddiad Ansawdd sy'n cyd-fynd â'r datganiad blynyddol ar [ystadegau mamolaeth a genedigaethau](#).

Dangosydd 2: Disgwyliad oes iach adeg geni, gan gynnwys y bwlch rhwng y mwyaf a'r lleiaf difreintiedig

Cyhoeddir disgwyliad oes iach adeg geni, gan gynnwys gwybodaeth dechnegol am y mesurau, gan [Arsyllfa Iechyd Cyhoeddus Cymru](#).

Dangosydd 3: Canran yr oedolion sydd â dau neu fwy ymddygiad ffordd iach o fyw

Daw'r data o [Arolwg Cenedlaethol Cymru](#). Gall ymddygiad sy'n gysylltiedig ag iechyd fod yn faes cymhleth i'w fesur ac efallai y bydd rhai gwahaniaethau rhwng yr hyn mae pobl yn ei ddweud a'r hyn maen nhw'n ei wneud. Fodd bynnag, mae data'r arolwg yn dal i fod yn ffordd ddibynadwy o gymharu patrymau dros amser a rhwng gwahanol grwpiau. Mae'r dangosydd hwn yn cyfuno gwybodaeth am bum ymddygiad gwahanol o ran ffordd o fyw. Ni ddylid cymharu canlyniadau 2020-21 ymlaen â'r blynyddoedd blaenorol. I gael rhagor o wybodaeth, gweler y canlyniadau ar [Ffordd o Fyw Oedolion](#) ac [adroddiad ansawdd](#) Arolwg Cenedlaethol Cymru.

Dangosydd 4: Lefelau llygredd Nitrogen Deuocsid (NO₂) yn yr aer

Bob blwyddyn, mae model Mapio Hinsawdd Llygredd Llywodraeth y Deyrnas Unedig yn cyfrifo'r crynodiadau llygredd cyfartalog ar gyfer pob cilometr sgwâr yn y Deyrnas Unedig. Mae'r model yn cael ei raddnodi yn erbyn mesuriadau a gymerir o rwydwaith monitro ansawdd aer cenedlaethol y Deyrnas Unedig.

Mae Llywodraeth Cymru wedi defnyddio'r data cyhoeddedig hwn i neilltuo crynodiad o NO₂, PM_{2.5} a PM₁₀ i bob annedd breswyl yng Nghymru ar sail y cilometr sgwâr o Gymru y mae wedi ei leoli ynddo.

Ar gyfer pob ardal cynnyrch y cyfrifiad (unedau daearyddol ystadegol sy'n cynnwys tua 150 eiddo), cynhyrchwyd cyfartaledd ar gyfer y crynodiadau llygredd sy'n gysylltiedig â phob annedd i roi crynodiad NO₂, PM_{2.5} a PM₁₀ cyfartalog ar draws ardal cynnyrch y cyfrifiad.

Ar gyfer pob awdurdod lleol a bwrdd iechyd lleol, cyfrifwyd cyfartaledd pwysedig y boblogaeth dros ardal cynnyrch y cyfrifiad i roi crynodiad NO₂, PM_{2.5} a PM₁₀ cyfartalog yn seiliedig ar ble mae pobl yn byw yn yr Awdurdodau Lleol a'r Byrddau Iechyd hynny. Cafodd yr un cyfrifiad ei ailadrodd hefyd ar draws holl ardaloedd cynnyrch y cyfrifiad er mwyn rhoi ffigur cymharol ar gyfer Cymru gyfan.

Dangosydd 5: Canran y plant sydd â dau neu fwy ymddygiad ffordd iach o fyw

Mae'r data yn seiliedig ar [Arolwg Iechyd a Lles Myfyrwyr](#) y Rhwydwaith Ymchwil Iechyd mewn Ysgolion.

Mae'r arolwg yn cael ei gynnal gan y Rhwydwaith Ymchwil Iechyd mewn Ysgolion, sy'n cael ei arwain gan y Ganolfan Gwerthuso a Datblygu Ymyriadau Cymhleth er mwyn Gwella Iechyd y Cyhoedd (DECIPHer) ym Mhrifysgol Caerdydd mewn partneriaeth gyda Llywodraeth Cymru; Iechyd Cyhoeddus Cymru; Cancer Research UK; a Sefydliad Ymchwil, Data a Methodoleg Gymdeithasol ac Economaidd Cymru (WISERD). Cynhelir yr arolwg bob dwy flynedd, ac mae'n rhoi ciplun rheolaidd o ymddygiadau iechyd pobl ifanc rhwng 11-16 oed yng Nghymru. Mae'r arolwg yn cael ei gwblhau ar-lein yn yr ystafell ddosbarth. Yn 2019/20, roedd bron i 120,000 o fyfyrwyr wedi cymryd rhan yn yr arolwg.

Gweler adran "Dulliau" yr adroddiad cenedlaethol am ragor o wybodaeth am ansawdd a methodoleg.

Dangosydd 6: Mesur datblygiad plant ifanc

Gweler yr adran asesiadau sylfaenol Cyfnod Sylfaen yn y datganiad ystadegol ar gyfer [cyflawniad Academaidd mewn asesiad sylfaenol y Cyfnod Sylfaen ac yng Nghyfnod Allweddol 3, 2022](#).

Dangosydd 7: Sgôr 9 pwynt wedi ei chapio cyfartalog ar gyfer disgyblion, gan gynnwys y bwch rhwng y rhai sy'n gymwys i gael prydau ysgol am ddim a'r rhai nad ydynt yn gymwys

Gweler adran ansawdd y [datganiad ystadegol blynyddol Canlyniadau Arholiadau](#).

Dangosydd 8: Canran yr oedolion â chymwysterau ar wahanol lefelau'r Fframwaith Cymwysterau Cenedlaethol

Gweler adran ansawdd y datganiad ystadegol [Lefel y cymwysterau uchaf a ddelir gan oedolion o oed gweithio.](#)

Dangosydd 9: Gwerth Ychwanegol Gros fesul awr gweithio, mynegai (Deyrnas Unedig = 100)

Cyhoeddir y data hwn gan y Swyddfa Ystadegau Gwladol. Mae rhagor o wybodaeth ar gael ar [dudalen we gwybodaeth ansawdd a methodoleg Cynhyrchiant Llafur.](#)

Dangosydd 10: Incwm Gwario Gros yr Aelwydydd y pen

Cyhoeddir y data hwn gan y Swyddfa Ystadegau Gwladol. Mae rhagor o wybodaeth ar gael yn y [papur gwybodaeth ansawdd a methodoleg incwm gwario gros yr aelwydydd rhanbarthol.](#)

Dangosydd 11: Canran y busnesau sy'n gwneud gweithgareddau arloesedd gweithredol

Mae'r data hwn yn dangos canran y busnesau sy'n gwneud gweithgareddau arloesedd gweithredol. Mae diffiniad y Deyrnas Unedig o arloesedd yn dilyn diffiniad yr UE gyfan a fabwysiadwyd gan Eurostat. Ystyrir bod busnesau'n gwneud gweithgareddau arloesedd gweithredol os ydynt:

- wedi cyflwyno cynnyrch (nwyddau neu wasanaeth) neu broses newydd neu sydd wedi gwella'n sylweddol
- wedi cyfrannu at brosiectau arloesi sydd heb gael eu cwblhau eto neu sydd wedi cael eu rhoi o'r neilltu
- wedi sicrhau ffurfiau newydd a llawer gwell o ran trefniadaeth, arferion neu strwythurau busnes, a strategaethau neu gysyniadau marchnata

Er bod pob cyfradd ar gael ar gyfer y ddwy sail poblogaeth, yn ogystal ag ar gyfer sawl grŵp oedran arall, defnyddir sail poblogaeth safonol swyddogol ar gyfer pob un o'r cyfraddau, fel a ganlyn:

- Canran y boblogaeth o oedran gweithio
- Gweithgarwch economaidd
- Cyflogaeth
- Anweithgarwch economaidd (gan gynnwys neu eithrio myfyrwyr)
- Canran y boblogaeth economaidd weithgar 16 oed a hŷn
- Diweithdra ILO

Mae Arolwg Arloesedd y Deyrnas Unedig yn cael ei gynnal gan y Swyddfa Ystadegau Gwladol ar ran yr Adran Busnes, Ynni a Strategaeth Ddiwydiannol (BEIS). Mae Arolwg Arloesedd y Deyrnas Unedig yn rhan o Arolwg Arloesedd Cymunedol ehangach sy'n cwmpasu gwledydd yr UE. Mae'r arolwg yn seiliedig ar holiadur craidd a ddatblygwyd gan y

Comisiwn Ewropeaidd (Eurostat) ac Aelod-wladwriaethau. Roedd Arolwg Arloesedd y Deyrnas Unedig 2017 wedi samplu tua 30 mil o fentrau yn y Deyrnas Unedig. Roedd yr arolwg yn wirfoddol a chafodd ei gynnal ar ffurf holiadur yn y post, a chyfweliad dros y ffôn ar gyfer y busnesau nad oedd eto wedi ymateb drwy'r post. Roedd yr arolwg yn cynnwys mentrau â 10 neu fwy o weithwyr yn adrannau C-K y Dosbarthiad Diwydiannol Safonol 2007. Mae'r sampl wedi ei dethol o Gofrestr Ryngadrannol o Fusnesau y Swyddfa Ystadegau Gwladol.

Amllder cyhoeddi: Bob dwy flynedd.

Cyfnodau cyfeirio data: 2008/10 i 2018/20.

Defnyddwyr, defnyddiau a chyd-destun: Mae'r data'n bwydo i mewn i'r dadansoddiadau economaidd a gwaith arall sy'n ymwneud â pholisi. Mae'n rhoi ciplun cyfnodol o ymddygiad o ran arloesedd, gyda'r budd ychwanegol o set ddata'r panel sy'n hwyluso astudiaethau hydredol a gwerthusiadau o bolisiau arloesi.

Ansawdd ystadegol: Mae'r canlyniadau'n amcangyfrifon a seilir ar samplau ac felly'n dangos amrywioldeb samplu i raddau gwahanol, h.y. mae gwir werth unrhyw fesur mewn ystod sy'n ymwneud â'r gwerth amcangyfrifol. Mae'r ystod neu'r amrywioldeb samplu dan sylw yn cynyddu wrth i'r manylion yn y data gynyddu, er enghraifft mae data awdurdodau lleol unigol yn amrywio mwy na data Cymru.

Am fwy o wybodaeth gweler [Arolwg Arloesedd y Deyrnas Unedig 2021](#).

Dangosydd 12: Capasiti mewn megawat (MW) y cyfarpar ynni adnewyddadwy a osodir

Daw'r dangosydd o'r astudiaeth [Cynhyrchu Ynni yng Nghymru](#). Comisiynwyd Regen gan Lywodraeth Cymru i gynhyrchu cronfa ddata o brosiectau cynhyrchu ynni yng Nghymru; canfod i ba raddau mae'r prosiectau'n eiddo i unigolion, sefydliadau a chymunedau yng Nghymru; a dadansoddi'r data i lunio adroddiad ar gynydd.

Mae'r dull ymchwil a ddatblygodd Regen i greu darlun manwl o ddulliau cynhyrchu ynni ledled Cymru yn cynnwys:

- adnabod, coladu, glanhau a chroesgyfeirio cofnodion o'r cyfresi data presennol;
- dilysu a dadansoddi'r data i sicrhau trosolwg cenedlaethol cadarn a data lleol pan fydd ar gael;
- dilysu'r data gyda rhanddeiliaid a'r diwydiant lle bo'n briodol;
- ymchwilio i fanylion perchenogaeth, gan gynnwys cyfeirio at Dŷ'r Cwmnïau i bennu prosiectau sy'n eiddo lleol.

Mae'r prif ffynonellau data a ddefnyddiwyd yn yr astudiaeth yn cynnwys y canlynol:

Data Tariff Cyflenwi Trydan Ofgem

Data Gwarant Tarddiad Ynni Adnewyddadwy

Cofrestr Rhwymedigaeth Ynni Adnewyddadwy

Data Cymhelliant Gwres Adnewyddadwy a Thaliad y Premiwm Gwres Adnewyddadwy

Data cysylltiadau Western Power Distribution

Data cysylltiadau SP Energy Networks

Data Gemserv MCS

Cronfa ddata Cynllunio ar gyfer Ynni Adnewyddadwy

Cysylltu â chyfleustodau

Cysylltu â gosodwyr a sefydliadau'r diwydiant

Arolwg o osodwyr storfeydd bach.

Ystadegau ynni BEIS

Dangosydd 13: Crynodiad carbon a deunydd organig mewn pridd

Caiff ei fesur o samplau pridd gan ddefnyddio'r fethodoleg colled wrth danio i bennu crynodiad carbon y pridd. Mae Rhaglen Monitro a Gwerthuso Glastir yn casglu tystiolaeth ar gyfer pob un o'r chwe chanlyniad arfaethedig o gynllun Glastir; lliniaru newid yn yr hinsawdd, gwella ansawdd pridd a dŵr, atal dirywiad bioamrywiaeth, rheoli coedlannau yn well a gwella mynediad at dirwedd Cymru a chyflwr nodweddion hanesyddol. Cyflawnir llawer o hyn drwy arolwg maes o 300 o sgwariau 1km ledled Cymru, gyda hanner ohonynt yn canolbwyntio ar ardaloedd sy'n cael blaenoriaeth ar gyfer taliadau uwch. Dewisir y sgwariau 1km ar hap o 26 dosbarth tir, gan sicrhau darpariaeth dda o dirwedd Cymru. Bydd sgwariau'n cael eu harolygu dros gyfnod o bedair blynedd ac yna byddir yn ailymweld â nhw yn ystod y pedair blynedd ganlynol, sy'n golygu y bydd tystiolaeth o newid yn cael ei chasglu a bydd effeithiau tywydd eithafol un flwyddyn yn cael eu lleihau. Bydd arwynebedd 'tir Glastir' ym mhob sgwâr a arolygir yn amrywio a chaiff hyn ei ystyried yn ystod y gwaith dadansoddi. Mae data o raglenni monitro arbenigol parhaus, gyda llawer ohono'n cael ei gasglu gan y Ganolfan Cofnodion Biolegol, hefydwedi ei gynnwys mewn dadansoddiadau lle bo modd er mwyn gwneud y defnydd gorau posibl o'r holl weithgarwch monitro parhaus. Mae modelau'n cael eu defnyddio i amcangyfrif y canlyniadau disgwyledig ar gyfer y dyfodol er mwyn gallu gwneud addasiadau i gyd-fynd â blaenoriaethau Llywodraeth Cymru a chynyddu effaith y cynllun.

Cymerir samplau o bob un o'r 26 dosbarth tir yng Nghymru, gan gynnwys y cyrion arfordirol ac o gwmpas trefi. Mae'r arolwg yn cynnwys 300 o sgwariau 1km, gyda thua hanner ohonynt y tu allan i Glastir. Bwriedir iddo fod yn arolwg Cymru gyfan. Nid yw'r arolwg yn cynnwys ardaloedd dinesig tra-datblygedig ac felly ni ddylid ei ystyried fel rhestr ar gyfer safleoedd tir llwyd.

Mae gwybodaeth am Raglen Monitro a Gwerthuso Glastir ar gael ar ei [gwefan](#).

Dangosydd 14: Ôl troed byd-eang Cymru

Mae gwybodaeth am y fethodoleg ar gael yn yr adroddiad [Ôl troed Ecologol a Charbon Cymru](#).

Dangosydd 15: Swm y gwastraff a gynhyrchir, nad yw'n cael ei ailgylchu, y pen

Mae'r dangosydd hwn yn cael ei gyfrifo o dair elfen ar wahân – gwastraff cartrefi, Gwastraff Adeiladu a Dymchwel, a Gwastraff Diwydiannol a Masnachol.

Gwastraff Cartrefi – mae'r elfen hon yn seiliedig ar wastraff cartrefi gweddilliol (h.y. heb ei ailgylchu) a gesglir. Nid yw'r data hwn yn ystyried unrhyw wastraff sy'n cael ei gynhyrchu fel gwastraff gweddilliol os yw'n cael ei ailgylchu yn ddiweddarach, na gwastraff sy'n cael ei gynhyrchu mewn ffrydiau ailgylchu sy'n cael ei wrthod ar gyfer ei waredu yn ddiweddarach. Ffynhonnell y data hwn yw Llif Data Gwastraff, sy'n casglu data gwastraff trefol awdurdodau

lleol yn rheolaidd. Mae'r data yn seiliedig ar flwyddyn ariannol. Mae gwybodaeth ychwanegol ar gael yn y datganiad ystadegol: [Rheoli gwastraff trefol awdurdod lleol](#)

Gwastraff Adeiladu a Dymchwel – mae'r elfen hon yn seiliedig ar ddiffiniad targed adfer Adeiladu a Dymchwel Fframwaith Gwastraff yr UE. Nid yw hyn yn cynnwys gwastraff peryglus a phridd a cherrig naturiol. Mae'n cynnwys gweithgareddau ôl-lenwi. Ffynhonnell y data hwn yw arolwg gwastraff Adeiladu a Dymchwel 2019, lle casglwyd data o 508 o safleoedd busnes o wahanol sectorau a meintiau ledled Cymru rhwng mis Ebrill 2021 a mis Medi 2021. Mae gwybodaeth fethodolegol ychwanegol ar gael yn Adran 2 yr adroddiad [Arolwg gwastraff adeiladu a dymchwel](#).

Gwastraff Diwydiannol a Masnachol - ffynhonnell y data hwn yw arolwg gwastraff diwydiannol a masnachol 2018, lle casglwyd data o 1,755 o safleoedd busnes o wahanol sectorau a meintiau ledled Cymru rhwng mis Ebrill 2019 a mis Hydref 2019. Mae gwybodaeth fethodolegol ychwanegol ar gael yn Adran 2 yr adroddiad: [Arolwg o wastraff diwydiannol a masnachol a gynhyrchwyd yng Nghymru 2012](#).

Dangosydd 16: Canran y bobl sydd ar gontractau parhaol (neu mewn contractau dros-dro, a ddim yn chwilio am waith parhaol) sy'n ennill o leiaf y cyflog byw gwirioneddol

Cyfrifir y dangosydd hwn o'r Arolwg Blynyddol o'r Boblogaeth. Mae'r dangosydd hwn yn mesur canran y bobl sy'n cael eu cyflogi, ar gontractau parhaol (neu ar gontractau dros dro, ac nad ydynt yn chwilio am waith parhaol) ac sy'n ennill o leiaf y cyflog byw gwirioneddol.

Gweler [tudalen we Ansawdd a Methodoleg yr Arolwg Blynyddol o'r Boblogaeth](#)

Dangosydd 17: Gwahaniaeth cyflog ar sail rhywedd, anabledd ac ethnigrwydd

Mae gwybodaeth am wahaniaeth cyflog rhwng y rhywiau yn cael ei chyfrifo o'r Arolwg Blynyddol o Oriau ac Enillion (ASHE) a'i chyhoeddi gan y Swyddfa Ystadegau Gwladol.

Mae gwybodaeth am wahaniaeth cyflog ar sail Anabledd ac Ethnigrwydd yn cael ei chyfrifo o'r Arolwg Blynyddol o'r Boblogaeth a'i chyhoeddi gan y Swyddfa Ystadegau Gwladol

Gweler [Arolwg Blynyddol o Oriau ac Enillion, Cyflogau isel a Gwybodaeth Ansawdd a Methodoleg am ganlyniadau pensiwn yr Arolwg Blynyddol o Oriau ac Enillion](#); [Gwybodaeth Ansawdd a Methodoleg yr Arolwg Blynyddol o'r Boblogaeth](#); a'r ffynonellau data ac adrannau ansawdd o'r [Bylchau cyflog ar sail anabledd yn y DU – Y Swyddfa Ystadegau Gwladol \(ons.gov.uk\)](#); [Bylchau cyflog ar sail ethnigrwydd – Y Swyddfa Ystadegau Gwladol \(ons.gov.uk\)](#).

Dangosydd 18: Canran y bobl sy'n byw ar aelwydydd mewn tlodi incwm o'i gymharu â chanolrif y Deyrnas Unedig, wedi ei fesur ar gyfer pawb, plant, oedolion o oedran gweithio a'r rhai o oedran pensiwn

Cyhoeddir y data hwn gan yr Adran Gwaith a Phensiynau. Mae gwybodaeth am fethodoleg ac ansawdd ar gael ar [wefan](#) ystadegau Cartrefi Islaw'r Incwm Cyfartalog.

Mae Llywodraeth Cymru hefyd yn cynnal dadansoddiad ychwanegol o setiau data Cartrefi Islaw'r Incwm Cyfartalog er mwyn ystyried statws economaidd, deiliadaeth tai, teulu, ethnigrwydd a nodweddion anabledd. Mae'r data a'r dadansoddiadau cryno hyn ar gael ar

[tudalennau gwe Ystadegau Tlodi](#) Llywodraeth Cymru. Mae gwybodaeth am [fethodoleg](#) a [dehongli data](#) hefyd ar gael ar y tudalennau hyn.

Dangosydd 19: Canran y bobl sy'n byw ar aelwydydd mewn amddifadedd materol

Cafodd y cwestiynau yn Arolwg Cenedlaethol Cymru eu cymryd o'r Arolwg o Adnoddau Teulu, ac mae'r fethodoleg a ddefnyddiwyd i ddsbarthu pobl yn defnyddio dull tebyg, ond nid union yr un fath (mae'r Arolwg o Adnoddau Teulu hefyd yn defnyddio incwm a gofynnwyd rhai cwestiynau yn yr Arolwg Cenedlaethol i'r rhai a oedd yn cael eu hystyried fel rhai 'ar y ffin' o ran bod yn ddifreintiedig yn unig).

Gofynnwyd i oedolion nad oeddent yn bensynwyr a oeddent wedi cael pethau fel 'gwylliau oddi cartref am o leiaf wythnos y flwyddyn', 'digon o arian i gadw eu cartref mewn cyflwr priodol o ran addurn' neu a oeddent yn gallu 'cynilo £10 y mis neu fwy yn rheolaidd'. Roedd y cwestiynau'n canolbwyntio ar a oeddent yn gallu fforddio'r eitemau hyn.

Gofynnwyd cwestiynau ychydig yn wahanol i bensynwyr, er enghraifft, a oedd eu 'cartref yn ddigon cynnes' a oeddent yn gallu 'defnyddio car neu dacsï pan oedd angen', neu a oeddent yn cael 'mynd i wneud eu gwallt neu i dorri eu gwallt yn rheolaidd'. Roedd y cwestiynau hyn hefyd yn gofyn a allent eu fforddio, ond hefyd yn canolbwyntio ar beidio â gallu cael yr eitemau hyn am resymau eraill, fel iechyd gwael, neu neb i'w helpu ac ati.

Rhoddwyd sgôr i'r bobl nad oedd ganddynt yr eitemau y gofynnwyd amdanynt. Er enghraifft, os nad oedd ganddynt unrhyw eitem ar y rhestr, byddent yn sgorio 100, ac os oedd ganddynt bob eitem, byddent yn sgorio 0. Roedd pobl nad oeddent yn bensynwyr ac a oedd wedi cael sgôr o 25 neu uwch, yn cael eu hystyried mewn amddifadedd ac roedd pensynwyr a oedd wedi cael sgôr o 20 neu uwch yn cael eu hystyried mewn amddifadedd. Mae pensynwyr a phobl nad ydynt yn bensynwyr wedi cael eu grwpio gyda'i gilydd ar gyfer y dangosydd hwn.

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 20: Cyfran y cyflogeion y pennir eu cyflog drwy gydfargeinio

Mae canlyniadau'r dangosydd hwn ar gael o'r Arolwg Blynyddol o Oriau ac Enillion, a gyhoeddwyd gan y Swyddfa Ystadegau Gwladol. Mae'r dangosydd hwn yn mesur swyddi gweithwyr 16 oed a hŷn, ac mae eu cyflog yn cael ei bennu gan gyfeirio at gydgytundeb ym mis Ebrill yn y blynyddoedd a ddangosir.

Gweler [Arolwg Blynyddol o Oriau ac Enillion, Cyflogau Isel a Gwybodaeth Ansawdd a Methodoleg am Ganlyniadau Pensiwn yr Arolwg Blynyddol o Oriau ac Enillion](#).

Dangosydd 21: Canran y boblogaeth 16-64 oed mewn gwaith yng Nghymru

Cyhoeddir y data hwn gan y Swyddfa Ystadegau Gwladol. Gweler [tudalen we Ansawdd a Methodoleg yr Arolwg Blynyddol o'r Boblogaeth](#).

Dangosydd 22: Canran y bobl mewn addysg, cyflogaeth neu hyfforddiant, wedi ei fesur ar gyfer gwahanol grwpiau oedran

Gweler adran ansawdd y datganiad ystadegol [Cyfranogiad pobl ifanc mewn addysg a'r farchnad lafur](#) a'r bwletin ystadegol ar gyfer [Pobl ifanc nad ydynt mewn addysg, cyflogaeth na hyfforddiant \(NEET\)](#).

Mae rhagor o fanylion ar gael yn y [nodyn methodoleg](#) ar gyfer cael amcangyfrifon o gyfranogiad pobl ifanc mewn addysg a'r farchnad lafur a'r [canllaw](#) i wahanol ffynonellau ystadegau NEET yng Nghymru.

Dangosydd 23: Canran y bobl sy'n teimlo eu bod yn gallu dylanwadu ar benderfyniadau sy'n effeithio ar eu hardal leol

Mae'r dangosydd yn defnyddio canran y bobl sy'n 'cytuno'n gryf' neu'n 'tueddu i gytuno' â'r datganiad "Rwy'n gallu dylanwadu ar benderfyniadau sy'n effeithio ar fy ardal leol".

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 24: Canran y bobl sy'n fodlon â'u gallu i gyrraedd/ cael mynediad at y cyfleusterau a'r gwasanaethau sydd eu hangen arnynt

Mae'r dangosydd hwn yn mesur canran y bobl 16 oed a hŷn sy'n dweud eu bod yn teimlo'n fodlon iawn neu'n eithaf bodlon â'u gallu i gyrraedd/ cael mynediad at y cyfleusterau a'r gwasanaethau sydd eu hangen arnynt, o fewn 15 i 20 munud ar droed o'u cartref.

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 25: Canran y bobl sy'n teimlo'n ddiogel gartref, wrth gerdded yn yr ardal leol, ac wrth deithio

Mae hyn yn seiliedig ar bedwar cwestiwn gwahanol a ofynnwyd yn Arolwg Cenedlaethol Cymru ac mae'n defnyddio canran y bobl sy'n dweud eu bod yn teimlo'n 'ddiogel iawn' neu'n 'eithaf diogel' ym mhob un o'r sefyllfaoedd canlynol ar ôl iddi dywyllu:

- yn eu cartref
- wrth gerdded ar eu pennau eu hunain
- wrth deithio ar drafnidiaeth gyhoeddus
- wrth deithio mewn car

Mae dadansoddiad mwy manwl ar gael yn yr adroddiad ystadegol "[Teimlo'n ddiogel yn yr ardal leol](#)".

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 26: Canran y bobl sy'n fodlon ar eu hardal leol fel lle i fyw

Gweler [adroddiad ansawdd](#) Arolwg Cenedlaethol Cymru am ragor o wybodaeth a'r adroddiad ymchwil "[Teimlo'n fodlon â'r ardal leol](#)".

Dangosydd 27: Canran y bobl sy'n cytuno eu bod yn perthyn i'r ardal, bod pobl o gefndiroedd gwahanol yn cyd-dynnu'n dda, a bod pobl yn trin ei gilydd â pharch

Mae'r dangosydd hwn yn seiliedig ar dri chwestiwn gwahanol a ofynnwyd yn Arolwg Cenedlaethol Cymru, ac mae'n defnyddio cyfran y bobl sy'n cytuno'n gryf neu'n tueddu i gytuno ar y canlynol:

- eu bod yn perthyn i'w hardal leol
- bod yr ardal leol yn lle gall pobl o gefndiroedd gwahanol gyd-dynnu'n dda
- bod pobl yn yr ardal leol yn trin ei gilydd â pharch ac ystyriaeth

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg a'r adroddiad ymchwil "[Ymdeimlad o gymuned](#)".

Dangosydd 28: Canran y bobl sy'n gwirfoddoli

Mae'r dangosydd yn defnyddio canran yr oedolion sy'n rhoi o'u hamser am ddim i helpu clybiau neu sefydliadau. Nid yw'r data a gyflwynir yn cynnwys pobl sy'n gofalu am rywun.

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 29: Sgôr lles meddyliol cymedrig ar gyfer pobl

Oedolion: Mae'r sgôr lles meddyliol cymedrig yn cael ei chyfrifo yn ôl Graddfa Llesiant Meddyliol Warwick-Edinburgh (WEMWBS). Er mwyn asesu lles meddyliol ar raddfa WEMWBS, rhoddwyd 14 datganiad i'r ymatebwyr fel "Rydw i wedi bod yn teimlo wedi ymlacio" a "Rydw i wedi bod yn meddwl yn glir" a gofynnwyd iddynt pa mor aml roedden nhw'n teimlo fel hyn ar raddfa pum pwynt, lle'r oedd 1 yn 'ddim o'r amser' a 5 yn 'drwy'r amser'. Cyfrifwyd sgôr rhwng 14 a 70 ar sail yr ymatebion hyn, gyda sgoriau uwch yn dangos gwell llesiant. I gael rhagor o wybodaeth, gweler y [datganiad](#) gan gynnwys lles meddyliol.

Ni ddylid cymharu canlyniadau 2021-22 ymlaen â'r blynyddoedd blaenorol. Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r Arolwg Cenedlaethol.

Plant: Gweler adran ansawdd y datganiad [Mesurau iechyd a lles ar gyfer plant](#).

Dangosydd 30: Canran y bobl sy'n unig

Dyma ganran yr oedolion sy'n unig yn ôl graddfa unigrwydd De Jong Gierveld.

Er mwyn asesu lefelau unigrwydd ar y raddfa hon, rhoddwyd 6 datganiad i'r ymatebwyr fel "Rwy'n gweld eisiau cael pobl o'm cwmpas" a "Mae digon o bobl rwy'n teimlo'n agos atynt" a gofynnwyd iddynt nodi i ba raddau roedd y datganiadau hyn yn berthnasol iddynt. Cyfrifwyd sgôr rhwng 0 a 6 yn ddiweddarach, ac roedd y rhai a oedd wedi cael sgôr o 4 neu uwch yn cael eu hystyried yn unig.

Yn 2021-22, oherwydd natur sensitif rhai o'r cwestiynau, cafodd y modiwl unigrwydd ei gynnwys mewn adran ar-lein o'r arolwg. Ar ôl llenwi'r adran ffôn, gofynnwyd i'r ymatebwyr

fynd ar-lein a llenwi'r adran olaf. Aeth 90% o'r bobl a gwblhaodd yr arolwg ffôn ymlaen i lenwi'r adran ar-lein.

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r Arolwg Cenedlaethol.

Dangosydd 31: Canran yr anheddau sy'n rhydd o beryglon

Roedd Arolwg Cyflwr Tai Cymru 2017-18 yn mesur canran yr anheddau a oedd yn rhydd o beryglon categori 1 yn seiliedig ar y System Mesur Iechyd a Diogelwch ar gyfer Tai. Mae rhagor o wybodaeth ynghylch mesur a modelu'r peryglon hyn ar gael ym [mhrif ganlyniadau](#) ac [adroddiad technegol](#) Arolwg Cyflwr Tai Cymru.

Dangosydd 32: Nifer yr eiddo (cartrefi a busnesau) mewn perygl canolig neu uchel o lifogydd o afonydd a'r môr

Defnyddir yr Asesiad Bygythiad Llifogydd Cenedlaethol (NaFRA) ynghyd â'r Set Ddata Eiddo Cenedlaethol (NPD) i bennu nifer yr eiddo (preswyl ac amhreswyl) mewn perygl o lifogydd o afonydd a'r môr yng Nghymru.

Mae'r bygythiad llifogydd wedi ei nodi mewn pedwar categori risg:

- Risg Uchel - yn fwy na neu'n hafal i gyfle o 1 mewn 30 (3.3 y cant) mewn unrhyw flwyddyn benodol
- Risg Ganolig - llai nag 1 mewn 30 (3.3 y cant) ond yn fwy na neu'n hafal i gyfle o 1 mewn 100 (1 y cant) mewn unrhyw flwyddyn benodol
- Risg Isel - llai nag 1 mewn 100 (1 y cant) ond yn fwy na neu'n hafal i gyfle o 1 mewn 1,000 (0.1 y cant) mewn unrhyw flwyddyn benodol
- Risg Isel lawn - llai nag 1 cyfle mewn 1,000 (0.1 y cant) mewn unrhyw flwyddyn benodol

Mae'r NaFRA yn cynnwys llifogydd o bob afon gyda dalgyllch sy'n fwy na 3 cilomedr sgwâr, a'r holl lifogydd o'r môr (ar hyd yr arfordir agored ac aberoedd llanw). Mae afonydd llai wedi eu cynnwys yn yr asesiad pan maent mewn ardal y gallai llifogydd eithafol effeithio arni (cyfle o 0.1 y cant mewn unrhyw flwyddyn).

Mae'r asesiad yn ystyried math, lleoliad a chyflwr yr amddiffynfeydd rhag llifogydd, a'r cyfle i lifogydd mawr fynd dros y lan neu oresgyn yr amddiffynfeydd hyn. Mae tebygolrwydd llifogydd a'r costau (niwed economaidd) o ganlyniad i hynny yn cael eu hasesu ar gyfer parth effaith pob sgwâr 50m.

Nid yw'n cynnwys mathau eraill o lifogydd fel draeniau priffyrdd, carthffosydd, llif dros y tir neu ddŵr daear sy'n codi.

Dangosydd 33: Canran yr anheddau â pherfformiad ynni digonol

Mae gan anheddau sydd â pherfformiad ynni digonol sgôr SAP (Gweithdrefn Asesu Safonol) o 65 neu uwch. Cafodd y sgoriau SAP eu mesur gan syrfewyr cymwys fel rhan o Arolwg Cyflwr Tai Cymru 2017-18. Mae rhagor o wybodaeth ar gael yn [adroddiad effeithlonrwydd ynni anheddau](#) ac [adroddiad technegol](#) Arolwg Cyflwr Tai Cymru.

Dangosydd 34: Nifer yr aelwydydd a gafodd eu hatal rhag bod yn ddigartref am bob 10,000 aelwyd

Mae gwybodaeth am ansawdd data ar gael yn yr [adroddiad ansawdd](#) sy'n cyd-fynd â'r datganiad ar [Ddigartrefedd](#).

Dangosydd 35: Canran y bobl sy'n mynychu neu'n cymryd rhan mewn gweithgareddau celfyddydol, diwylliannol neu dreftadaeth o leiaf 3 gwaith y flwyddyn

Mae'r dangosydd hwn yn mesur canran y bobl sy'n dweud eu bod wedi mynychu neu gymryd rhan mewn gweithgaredd celfyddydol, diwylliannol neu dreftadaeth 3 gwaith neu fwy yn ystod y 12 mis diwethaf.

Mae dadansoddiad mwy manwl ar gael yn yr adroddiad ystadegol "[Celfyddydau, safleoedd treftadaeth, llyfrgelloedd ac amgueddfeydd](#)". Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 36: Canran y bobl sy'n siarad Cymraeg bob dydd ac sy'n gallu siarad mwy na dim ond ychydig o eiriau Cymraeg

Mae'r canlyniadau'n seiliedig ar ddata'r cyfrifiad a data'r Arolwg o'r Defnydd o'r Gymraeg.

Er mwyn bod yn gyson â dangosydd cenedlaethol 37, 'Canran y bobl sy'n gallu siarad Cymraeg', mae'r amcangyfrif hwn yn seiliedig ar ddata Cyfrifiad 2011 fel llinell sylfaen ar gyfer nifer y siaradwyr Cymraeg, wedi ei gyfuno â data o Arolwg o'r Defnydd o'r Gymraeg 2019-20 ar gyfer y rhai sy'n dweud eu bod naill ai'n 'rhugl yn y Gymraeg', yn gallu 'siarad cryn dipyn o Gymraeg', neu'r rhai sydd 'yn gallu siarad ychydig o Gymraeg yn unig'; ac sydd hefyd yn siarad Cymraeg bob dydd.

Nododd yr Arolwg o'r Defnydd o'r Gymraeg 2019-20 fod 10% o bobl tair oed neu hŷn yn siarad Cymraeg bob dydd ac yn gallu siarad mwy na dim ond ychydig o eiriau. Dyma'r un ganran ag yn yr Arolwg Defnydd o'r Gymraeg 2013-15.

Mae Arolwg Cenedlaethol Cymru yn darparu data blynyddol ar gyfer pobl 16 oed neu hŷn ac yn awgrymu bod y dangosydd hwn wedi bod yn sefydlog dros y blynyddoedd diwethaf ers Cyfrifiad 2011, sef tua 10-12%.

Gweler [adroddiad ansawdd](#) yr Arolwg o'r Defnydd o'r Gymraeg am ragor o wybodaeth am gryfderau a chyfyngiadau'r arolwg.

Dangosydd 37: Nifer y bobl sy'n gallu siarad Cymraeg

Mae'r dangosydd hwn yn defnyddio'r cyfrifiad poblogaeth.

Mae'r cyfrifiad yn parhau i fod yn ffynhonnell allweddol o wybodaeth am nifer y bobl sy'n gallu siarad Cymraeg, er bod gwybodaeth ar gael o ffynonellau fel yr Arolwg Blynyddol o'r Boblogaeth ac Arolwg Cenedlaethol Cymru. Wrth gymharu'r cwestiynau am y Gymraeg mewn arolygon aelwydydd â chanlyniadau Cyfrifiad 2011, mae'n bwysig cofio y gall gwahaniaethau o ran samplu, dulliau cyfweld, a dyluniad holiaduron arwain at wahaniaethau rhwng yr amcangyfrifon. Yn draddodiadol mae'r amcangyfrifon o nifer y siaradwyr Cymraeg yn uwch mewn arolygon aelwydydd (fel yr Arolwg Blynyddol o'r Boblogaeth ac Arolwg Cenedlaethol Cymru) nag yn y cyfrifiad – nid ydym yn gwybod yn union pam, er ei bod yn debygol bod y gwahaniaethau a grybwyllwyd uchod yn effeithio ar y canlyniadau. Mae

rhagor o wybodaeth am y gwahaniaethau rhwng y cyfrifiad a'r Arolwg Blynyddol o'r Boblogaeth ar gael mewn [bwletin sy'n cynnwys canlyniadau mwy manwl am y Gymraeg yn yr Arolwg Blynyddol o'r Boblogaeth rhwng 2001 a 2018](#). Mae rhagor o wybodaeth ansawdd a dulliau yn gysylltiedig â'r cyfrifiad ar gael ar [wefan](#) y Swyddfa Ystadegau Gwladol.

Rhwng cyfrifiadau, defnyddir Arolwg Cenedlaethol Cymru i fonitro tueddiadau yng nghyfran yr oedolion sy'n gallu siarad Cymraeg. Mae'r dangosydd yn seiliedig ar oedolion 16 oed neu hŷn sy'n dweud eu bod nhw'n gallu siarad Cymraeg. Mae'r cwestiwn yn caniatáu i bobl ateb ie, na, a hefyd yn caniatáu i bobl ddweud nad ydynt yn gallu siarad Cymraeg ond eu bod yn gallu siarad rhywfaint o Gymraeg. At ddiben y dangosydd hwn, diffinnir pobl sy'n gallu siarad Cymraeg fel y rhai sy'n ateb 'ie' i'r cwestiwn hwn yn unig.

Mae'n bosibl cymharu â chanlyniadau blynyddoedd blaenorol yr Arolwg Cenedlaethol (2012 – 2015).

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 38: Canran y bobl sy'n cymryd rhan mewn gweithgareddau chwaraeon dair gwaith yr wythnos neu fwy

Oedolion – roedd y cwestiynau a ofynnwyd yn deillio'n wreiddiol o'r Arolwg ar Oedolion Egniol, sydd bellach wedi eu hymgorffori yn Arolwg Cenedlaethol Cymru, gyda mân addasiadau.

Ar gyfer y dangosydd hwn, dangoswyd cyfres o weithgareddau dan do ac awyr agored i'r ymatebwyr a gofynnwyd iddynt a oeddent wedi cymryd rhan yn unrhyw un ohonynt. Os oeddent, gofynnwyd iddynt sawl gwaith yr oeddent wedi cymryd rhan yn y gweithgaredd dros y 4 wythnos flaenorol.

Nid oes modd cymharu canlyniadau'r Arolwg ar Oedolion Egniol ac Arolwg Cenedlaethol Cymru yn uniongyrchol oherwydd y gwahaniaethau yn nyluniad yr arolwg.

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Plant – Mae'r wybodaeth hon yn cael ei chyhoeddi gan [Chwaraeon Cymru](#). Mae'r Arolwg ar Chwaraeon Ysgol yn arolwg ar-lein o gyfranogiad chwaraeon disgyblion a darpariaeth Addysg Gorfforol a chwaraeon mewn ysgolion. Cynhaliwyd yr *Arolwg ar Chwaraeon Ysgol* diweddaraf yn ystod tymor yr haf 2018 rhwng 16 Ebrill a 24 Gorffennaf. Mae'r disgyblion yn llenwi holiadur ar eu cyfranogiad a'u hagweddau tuag at Addysg Gorfforol a chwaraeon. Yn arolwg 2018, cymerodd 118,893 o ddisgyblion Blwyddyn 3-11 ran yn yr arolwg ac fe wnaeth 1,055 o athrawon llenwi holiadur darpariaeth Arolwg ar Chwaraeon Ysgol. Disgwylir y diweddariad nesaf yn yr Hydref 2022.

Dangosydd 39: Canran yr amgueddfeydd ac archifau sy'n cadw casgliadau archifol/treftadaeth sy'n cyrraedd safonau achrededig y Deyrnas Unedig

Mae'r mesur ar gyfer amgueddfeydd yn dangos nifer y sefydliadau sydd wedi cyrraedd Safon Achredu Amgueddfeydd y Deyrnas Unedig. Y llinell sylfaen i fod yn gymwys ar gyfer statws Achredu yw bod y sefydliad yn bodloni diffiniad 1998 Cymdeithas yr Amgueddfeydd o amgueddfa, sef: "Mae amgueddfeydd yn galluogi pobl i archwilio casgliadau ar gyfer cael ysbrydoliaeth, dysgu a mwynhau. Maent yn sefydliadau sy'n casglu a diogelu arteffactau a

sbesimenau a gofalu eu bod ar gael ac yn cael eu cadw mewn ymddiriedolaeth ar gyfer y gymdeithas"; maent yn safle/lle/adeilad ffisegol sy'n agored i'r cyhoedd yn rheolaidd; maent yn galluogi'r cyhoedd i weld casgliadau'r sefydliad, ac ymgysylltu â nhw; mae ganddynt gyfansoddiad priodol sy'n cefnogi diben hirdymor amgueddfa gyhoeddus. Er mwyn ennill statws Achredu, rhaid i amgueddfa ddangos ei bod yn cael ei llywodraethu a'i rheoli'n briodol, yn rheoli ei chasgliadau'n effeithiol ac yn darparu profiadau priodol i ddefnyddwyr.

Mae'r mesur ar gyfer archifau yn dangos nifer y sefydliadau sy'n cadw archifau sydd wedi cyrraedd Safon Achredu'r Gwasanaeth Archifau yn y Deyrnas Unedig. Y diffiniad sylfaenol o wasanaeth archifau i'w gynnwys yn y mesur hwn yw y dylai'r Archifau Gwladol gydnabod bod y sefydliad yn Lle i Gadw cofnodion cyhoeddus lleol (ac sydd felly'n gorfod bodloni'r Safon Achredu er mwyn cadw'r dynodiad statudol hwn), a hefyd fod yn aelod o Gyngor Archifau a Chofnodion Cymru.

Mae gwybodaeth am y broses achredu ar gyfer [amgueddfeydd ac archifau](#) ar gael ar wefan Llywodraeth Cymru.

Dangosydd 40: Canran yr asedau amgylchedd hanesyddol dynodedig sydd mewn cyflwr sefydlog neu well

Henebion Cofrestredig

Mae arolygon o gyflwr henebion cofrestredig yng Nghymru wedi bod yn cael eu cynnal ers canol yr 1980au; maent yn cael eu cynnal yn fewnol gan dîm o Wardeiniaid Henebion Maes Cadw. Heddiw, gwneir hyn drwy raglen arolwg treigl lle mae 10 y cant o'r asedau'n cael eu harolygu bob blwyddyn gyda methodoleg asesu gyson. Defnyddir saith categori cyflwr cyffredinol, sy'n amrywio o rai sydd wedi eu dinistrio i rai sydd wedi gwella'n sylweddol.

Mae'r rhan fwyaf o'r henebion cofrestredig yn strwythurau cloddwaith ac yn adeiladau hanesyddol heb eu meddiannu, sydd fel arfer mewn cyflwr gwael fel cestyll, abatai canoloesol a gweddillion diwydiannol segur. Mae nifer ohonynt mewn lleoliadau anghysbell a gwledig. Mae natur ffisegol yr henebion cofrestredig yn golygu, yn absenoldeb unrhyw ymyriadau penodol, y byddai'r asesiad mwyaf tebygol o gyflwr ar gyfer y rhan fwyaf ohonynt yn sefydlog neu'n dangos mymryn o ddirywiad. Mae gwelliant i gyflwr bron yn ddieithriad yn digwydd o ganlyniad i ymyrraeth weithredol fel rheoli tir mewn ffordd gadarnhaol a phrosiectau cadwraeth sydd wedi eu targedu. Y prif fygythiadau sy'n effeithio ar henebion sydd wedi eu cofnodi fel rhai sydd mewn perygl yw'r tywydd, storm a difrod llifogydd sylweddol – mae pob un o'r rhain yn gysylltiedig ag effeithiau newid yn yr hinsawdd a thwf llystyfiant gormodol sydd heb gael ei glirio sy'n arwain at bydredd naturiol cyflymach – y ffordd orau o reoli hyn yw drwy arferion rheoli tir cadarnhaol.

Adeiladau rhestredig

Mae arolygon o gyflwr adeiladau rhestredig wedi bod yn cael eu cynnal yng Nghymru ers 1998. Mae'r rhaglenni adolygu'n cwmpasu cyfnod treigl o bum mlynedd, gydag oddeutu 20 y cant o'r stoc o adeiladau rhestredig yng Nghymru'n cael eu harolygu bob blwyddyn. Bydd y rhaglen o arolygon yn sicrhau bod cyflwr y 30,000 o adeiladau rhestredig yng Nghymru yn ystod cyfnod y rhaglen yn cael eu hasesu gan ddefnyddio methodoleg gyson. Cyfrifir cyfran yr adeiladau rhestredig sydd mewn cyflwr sefydlog neu sy'n gwella gan ddefnyddio data arolwg sy'n bodoli'n barod a'r data diweddaraf sydd ar gael o 20 y cant o'r stoc adeiladau sydd wedi cael ei ail-arolygu yn ystod y flwyddyn ddiwethaf.

Dylid nodi bod y ffigurau a gyflwynir ar gyfer pob blwyddyn yn ymwneud â'r sampl a arolygwyd yn ystod y flwyddyn honno. Daw sampl pob blwyddyn o nifer fach o awdurdodau lleol ar draws gwahanol ranbarthau Cymru. Rhaid disgwyl rhywfaint o amrywiad o un flwyddyn i'r llall.

Dangosydd 41: Allyriadau nwyon tŷ gwydr yng Nghymru

DEFRA sy'n cyhoeddi hwn. Mae rhagor o wybodaeth ar gael yn yr adroddiad [UK Greenhouse Gas Inventory, 1990 - 2022](#).

Dangosydd 42: Allyriadau nwyon tŷ gwydr a briodolir i ddefnyddio nwyddau a gwasanaethau byd-eang yng Nghymru

Ôl troed ecolegol

Nid oes dull y cytunwyd arno'n rhyngwladol ar gyfer cyfrifo ôl-troed cenedlaethol. Fodd bynnag, mae dwy fethodoleg sylfaenol yn cael eu derbyn yn eang ac maent wedi cael eu defnyddio mewn sawl astudiaeth:

- defnyddio gwybodaeth ariannol (gwerthoedd masnach) a lluosyddion sy'n deillio o ddadansoddiad mewnbwn-allbwn economaidd
- defnyddio gwybodaeth ffisegol (niferoedd masnach) ar y cyd â chyfernodau cylch bywyd sy'n nodi effaith y nwyddau hyn sydd wedi eu masnachu

Mae gan bob un ei fanteision a'i gyfyngiadau. Yn yr astudiaeth a ddefnyddiwyd ar gyfer y data a gyflwynwyd yn adroddiad Llesiant Cymru, ac astudiaethau blaenorol ar gyfer Cymru, dewiswyd y dull cyntaf. Y prif resymau dros hyn yw bod y dull yn seiliedig ar ddata masnach, cynhyrchu a defnydd byd-eang ar gyfer yr economi gyfan. Mae hyn yn golygu nad yw'n dioddef gwallau talfyrru (mae'n nodi'r effeithiau ar hyd y cadwyni cyflenwi cyfan). Mantais hanfodol dadansoddiad sy'n seiliedig ar fewnbwn-allbwn yw ei bod yn bosibl priodoli effeithiau amgylcheddol i bron unrhyw un o'r canlynol:

- gweithgarwch o ran defnydd, fel defnyddio rhanbarthau, gwledydd, llywodraethau, dinasoedd
- unigolion neu grwpiau economaidd-gymdeithasol, boed yn ddomestig neu dramor (mewnforion/allforion)
- gweithgarwch cynhyrchu, fel amaethyddiaeth, gweithgynhyrchu, gwasanaethau ac ati.
- gweithgarwch economaidd cysylltiedig fel cadwyni cyflenwi, llifoedd masnach neu ailgylchu

Mae dadansoddiad mewnbwn-allbwn wedi bod yn cael ei ddefnyddio mewn dadansoddiadau ôl troed ecolegol ers degawd ac mae bellach yn dechneig sydd wedi hen ennill ei phlwyf ar gyfer cyfrifo olion troed ecolegol gwledydd, endidau is-genedlaethol, grwpiau economaidd-gymdeithasol a sefydliadau neu gwmnïau. Fe'i derbynnir hefyd fel dull gweithredu o fewn safonau'r Rhwydwaith Ôl Troed Byd-eang (GFN).

Ôl troed carbon

Gellir hefyd cyfrifo ôl troed carbon gan ddefnyddio'r un dull mewnbwn-allbwn a ddisgrifir uchod, a defnyddir yr un dechneig er mwyn cysondeb ac er mwyn elwa o'r manteision a

restrir. Mae'r dull hwn hefyd yn cael ei ddefnyddio'n gyffredin i amcangyfrif allyriadau sy'n seiliedig ar ddefnydd ar lefel genedlaethol, ac mae wedi cael ei ddefnyddio mewn nifer o astudiaethau ar gyfer nifer o wahanol wledydd.

Mae gwybodaeth am y fethodoleg ar gael yn yr adroddiad [Ôl troed Ecolegol a Charbon Cymru - diweddariad hyd 2011](#).

Dangosydd 43: Ardal o ecosystemau iach yng Nghymru

Mae Cyfoeth Naturiol Cymru wedi datblygu dull newydd gan ddefnyddio delweddau lloeren i ddiweddaru ein dealltwriaeth bresennol o ddsbarthiad a graddfa cynefinoedd ledled Cymru. Bydd modd ei ddiweddaru dros y blynyddoedd nesaf gan ddefnyddio methodoleg a ffynonellau data cyson.

Dylid ystyried bod yr amcangyfrif diweddaraf sy'n defnyddio'r fethodoleg newydd hon yn un 'arbrofol' ar hyn o bryd, oherwydd bwriedir gwneud rhagor o waith i fireinio'r dull er mwyn gallu cyflwyno'r canlyniadau'n fwy manwl yn y dyfodol. Mae'r amcangyfrif o gynefinoedd lled-naturiol a gyflwynir yma yn cynnwys ardaloedd sy'n amlwg yn gynefinoedd lled-naturiol, y rhai sy'n rhedyn a rhai darnau o dir, a elwir yma yn gynefinoedd 'lled-naturiol ymgeisiol' sydd â'r potensial i weithredu'n fwy tebyg i gynefinoedd lled-naturiol na chynefinoedd sydd wedi bod yn destun gwelliant amaethyddol dwys.

I gael rhagor o fanylion, gweler Briff Cyfoeth Naturiol Cymru: [Llinell sylfaen newydd o'r ardal o gynefin lled-naturiol yng Nghymru ar gyfer Dangosydd 43](#).

Dangosydd 44: Statws amrywiaeth fiolegol yng Nghymru

Mae gwaith wedi cael ei gomisiynu drwy Raglen Monitro a Modelu'r Amgylchedd a Materion Gwledig Llywodraeth Cymru ar ddatblygu'r dangosydd cenedlaethol ar Statws Amrywiaeth Fiolegol yng Nghymru. Mae'r gwaith hwn wedi canolbwyntio ar gyfuno amcangyfrifon blynyddol yn un dangosydd newid yn nosbarthiad rhywogaethau â blaenoriaeth dros amser.

Gweler [ERAMMP Adroddiad-78: Adroddiad Interim ar Ddatblygu Dangosydd-44 \(Statws Amrywiaeth Fiolegol yng Nghymru\)](#) i gael rhagor o wybodaeth ynghylch methodoleg.

Dangosydd 45: Canran y cyrff dŵr wyneb a chyrff dŵr daear sydd wedi sicrhau statws cyffredinol da neu uchel

Ansawdd dŵr: Canran y cyrff dŵr wyneb a chyrff dŵr daear sydd wedi sicrhau statws cyffredinol da neu uchel o dan y Gyfarwyddeb Fframwaith Dŵr. Mae cyrff dŵr wyneb yng Nghymru yn cael eu dosbarthu ar sail eu statws gan Gyfoeth Naturiol Cymru fel un o ofynion y Gyfarwyddeb Fframwaith Dŵr. Diffinnir statws da fel dŵr sy'n dangos newid bach yn unig o'r hyn a ddisgwyllir fel arfer o dan amodau lle nad oes neb wedi tarfu arnynt. Mae statws cyffredinol da (y Gyfarwyddeb Fframwaith Dŵr) yn cynnwys y canlynol:

Dŵr Wyneb:

- 'Statws dŵr wyneb da' yw'r hyn sy'n cael ei gyflawni gan gorff dŵr wyneb pan fydd ei 'statws ecolegol' a'i 'statws cemegol' yn dda o leiaf.
- Mae 'statws ecolegol' yn fynegiant o strwythur a gweithrediad ecosystemau dyfrol sy'n gysylltiedig â dyfroedd wyneb. Mae dyfroedd o'r fath yn cael eu dosbarthu fel rhai â 'statws ecolegol da' pan fyddant yn bodloni gofynion y Gyfarwyddeb.

- Mae 'statws cemegol dŵr wyneb da' yn golygu nad yw crynodiadau'r cemegau yn y corff dŵr yn uwch na'r gwerthoedd terfyn amgylcheddol a nodir yn y Gyfarwyddeb.

Dŵr Daear:

- 'Statws dŵr daear da' yw'r hyn sy'n cael ei gyflawni gan gorff dŵr daear pan fydd ei statws meintiol a'i statws cemegol yn dda.
- Mae 'statws meintiol' yn fynegiant o'r graddau yr effeithir ar gorff dŵr daear yn uniongyrchol ac yn anuniongyrchol gan waith tynnu dŵr. Mae'r statws yn dda os ydy hyn yn cydymffurfio â gofynion y Gyfarwyddeb.
- Mae 'statws cemegol da' yn cael ei briodoli i ddŵr daear pan fydd yn bodloni gofynion y Gyfarwyddeb ar gyfer y lefelau uchaf o gemegau diffiniedig.

Dangosydd 46: Dinasyddiaeth byd-eang weithredol yng Nghymru

Cyflwynwyd cyfres newydd o gwestiynau am gymryd rhan mewn materion byd-eang yn 2021 ac fe'i cynhwyswyd yn adran ar-lein yr Arolwg Cenedlaethol. Mae'r cwestiynau'n gofyn a yw ymatebwyr wedi rhoi neu godi arian, gwirfoddoli neu gefnogi unrhyw weithgareddau sy'n ymwneud â materion byd-eang fel hawliau dynol, ffoaduriaid, neu faterion amgylcheddol byd-eang.

Gweler [adroddiad ansawdd](#) Arolwg Cenedlaethol Cymru am ragor o wybodaeth am gryfderau a chyfyngiadau'r arolwg.

Dangosydd 47: Canran y bobl sydd â hyder yn y system gyfiawnder

I gael eu mesur drwy ddefnyddio arolwg cymdeithasol priodol, megis yr Arolwg Cenedlaethol Cymru. Ychwanegir rhagor o fanylion am y mesur ar gyfer y dangosydd hwn wrth i fanylion y dangosydd gael ei ddatblygu

Dangosydd 48: Canran y siwrneiau drwy gerdded, beicio neu drafnidiaeth gyhoeddus

Hyd nes y datblygir Arolwg Teithio Cenedlaethol, mesurir y dangosydd hwn gan ddefnyddio data ar y dull arferol o deithio i'r gwaith o'r arolwg llafurlu. Gweler [adroddiad ansawdd](#) yr Arolwg o'r Llafurlu am ragor o wybodaeth.

Dangosydd 49: Canran yr aelwydydd sy'n gwario 30% neu fwy o'u hincwm ar gostau tai

Canran yr aelwydydd sy'n gwario 30% neu fwy o'u hincwm ar gostau tai sy'n deillio o ddata'r Arolwg o Adnoddau Teuluol (AAT) yr Adran Gwaith a Phensiynau. Mae costau tai yn cynnwys rhenti, llog morgais ac ad-daliadau cyfalaf, cyfraddau dŵr a charthffosiaeth, yswiriant strwythurol, taliadau gwasanaeth a threth cyngor (net o ad-daliadau). Nid yw'r defnydd o ynni domestig fel costau nwy a thrydan yn cael eu casglu fel rhan o'r arolwg hwn ac nid ydynt wedi'u cynnwys. Mae incwm yn incwm cartref anghyferthedig gros i bob aelod o'r cartref ac mae'n cynnwys yr holl fudd-daliadau, pensiynau, buddsoddiadau ac enillion. Cyflwynir data ar gyfer gwahanol ddaliadau tai gan gynnwys: Pob deiliadaeth; prynu'n gyfan gwbl; yn berchen ar forgais; rhent preifat; a thai cymdeithasol ar rent (o awdurdod lleol neu Landlord Cymdeithasol Cofrestredig). Mae'r canlyniadau yn seiliedig ar ddata blynyddoedd ariannol. Oherwydd maint samplau bach Cymru yn y data Arolwg o Adnoddau Teuluol mae tair blynedd ariannol yn cael eu cyfuno.

Cafodd proses casglu data 2020-21 ar gyfer Arolwg o Adnoddau Teulu'r AGP ei heffeithio gan COVID-19. O ganlyniad nad yw dadansoddiad o'r data AAT o dan lefel y DU yn cael ei argymhell gan ddefnyddio data 2020-21 oherwydd bod y cyfuniad o feintiau sampl llai a thuedd ychwanegol yn golygu nad yw'n bosibl gwneud asesiadau ystadegol ystyrlon o dueddiadau a newidiadau yn y flwyddyn ddiweddaraf o'i gymharu â'r lefel cyn y coronafeirws. [Gweler ein herthygl ar fesurau tlodi Ebrill 2020 i Fawrth 2021 am fwy o fanylion](#). O ganlyniad, mae'r data diweddaraf ar aelwydydd sy'n gwario 30% neu fwy o'u hincwm ar gostau tai yn seiliedig ar y tair blynedd ariannol hyd at 2019/20.

Dangosydd 50: Statws cynhwysiant digidol

Ar hyn o bryd o dan ddatblygiad, ochr yn ochr â datblygu safon byw digidol gofynnol. Ychwanegir rhagor o fanylion am y mesur ar gyfer y dangosydd hwn wrth i'r dangosydd gael ei ddatblygu.

Gwasanaethau Gwybodaeth a Dadansoddi, Llywodraeth Cymru

Medi 2022